



UMP bersama 50 pengamal industri erat hubungan kerjasama

Lebih 50 pengamal industri dari seluruh Malaysia menyertai Program Ramah Mesra Bersama Industri yang diadakan di Hotel Seri Pacific, Kuala Lumpur pada 25 Ogos 2016 yang lalu.

Program julung kali ini bertujuan untuk mengeratkan hubungan kerjasama di antara universiti dengan industri di samping meninjau prospek kolaborasi dalam bidang pendidikan, penyelidikan yang berpotensi untuk dimanfaatkan bersama.

Dalam majlis itu juga, Naib Canselor UMP, Profesor Dato' Dr. Daing Nasir Ibrahim berkongsi maklumat dalam pembentangan bertemakan 'Memasyarakatkan Teknologi' dan menyampaikan perkembangan dan hala tuju universiti serta inisiatif UMP dalam memperkenankan inisiatif MyGift sebagai dana universiti.

Menurut Profesor Dato' Dr. Daing Nasir, untuk menjadi pemain global yang kompetitif, UMP sentiasa komited mencipta inovasi dan keunikan dalam penawaran program akademik melalui jalinan strategik di peringkat antarabangsa dengan memperkenalkan program kejuruteraan yang sentiasa ditambah nilai melalui proses penanda aras secara berterusan menggunakan model bertaraf dunia seperti program kerjasama dengan Karlsruhe University of Applied Science (HsKA) Jerman.

"UMP terus mendapat kepercayaan pihak institusi Jerman, HsKA Jerman dalam menjalinkan hubungan kerjasama akademik dalam program kejuruteraan bertaraf dunia. Kesinambungan daripada usaha kejayaan dalam program dwijazah Sarjana Muda Kejuruteraan Automotif dan Ijazah Sarjana Muda Kejuruteraan Mekatronik kini diperluas dengan penawaran program dwijazah sarjana dalam bidang kejuruteraan automotif yang boleh dimanfaatkan masyarakat di negara ini," katanya.

Dato' Dr. Daing turut berkongsi tentang program dwijazah sarjana yang membuka lembaran baharu antara UMP dan HsKA bagi mengeratkan hubungan kerjasama strategik dan membuka peluang yang lebih meluas dalam bidang penyelidikan dan pembangunan akademik kedua-dua universiti.

Program ini bakal membuka lebih banyak peluang pelajar di negara ini untuk menjalankan penyelidikan dan inovasi serta berkongsi kepakaran dalam bidang kejuruteraan Jerman yang diiktiraf dunia. Ianya termasuklah dapat dimanfaatkan dalam kalangan jurutera industri, akademia serta pengamal industri automotif di Malaysia.

UMP kini mempunyai seramai 1,801 staf dengan 600 staf mempunyai latar belakang dalam industri termasuk 156 daripadanya

mempunyai pengalaman lebih lima tahun pengalaman industri yang dapat memberi kelebihan dalam memahami keperluan industri.

Penganjuran Program *CEO@Faculty* yang dijalankan UMP turut berpeluang berkongsi pengalaman dan pengetahuan berkaitan dunia korporat bersama earha universiti bagi membentuk serta membimbing dalam meningkatkan kebolehpasaran graduan serta pembangunan sahsiah secara holistik.

Pada masa ini, seramai tiga orang dilantik Kementerian Pendidikan Tinggi iaitu Ketua Pegawai Eksekutif Tenaga Nasional Berhad (TNB), Datuk Seri Ir. Azman Mohd, Pengarah Urusan Operasi Pulau Pinang Motorola Solutions, Dr. Hari Narayanan dan Ketua Setiausaha KPT, Tan Sri Dr Noorul Ainor Mohd. Nor.

Pencapaian pelajar UMP juga diiktiraf di peringkat antarabangsa apabila seramai tiga orang pelajar UMP dianugerahkan Biasiswa Konfusian bagi mengikuti Program Mobiliti Bahasa Mandarin Musim Panas 2016 di Tianjin Universiti, China. UMP ialah satu-satunya universiti di Malaysia mendapat biasiswa Konfusian ini.

Justeru, dalam usaha melonjakkan mutu pendidikan tinggi negara dan pada masa yang sama keperluan terhadap universiti berdikari, UMP mengadakan beberapa inisiatif lain dalam mendapatkan pendapatan bagi pembiayaan termasuk *endowmen*, tabung dan program pengkomersialan dengan memperkenalkan Program *MyGift* UMP yang merupakan saluran sumbangan *endowmen* universiti bagi tujuan tajaan biasiswa, kemudahan prasarana kepada pelajar mahupun membudayakan semangat sukarelawan dalam membantu golongan yang memerlukan.

Sepuluh jenis *endowmen* atau tabungan yang dilaksanakan adalah *Endowmen Kursi*, *Endowmen Basiswa Pelajar*, *Endowmen Makmal/Kemudahan* dan *Endowmen Kecemerlangan* manakala Tabung Ramadan, Tabung Masjid, Tabung Bencana, Tabung Wakaf, Tabung Komuniti dan Tabung Tidak Patuh Syariah.

Program ini bakal diperkenalkan sebagai kemudahan kepada warga kampus dan alumni serta pihak luar terutamanya daripada industri mahupun syarikat untuk sama-sama menyumbang kepada tabung *endowmen* universiti.

Majlis turut dihadiri Pengerusi Lembaga Pengarah UMP, Dato' Sri Mohd Hilmey Mohd. Taib, Penaung Dewan Perniagaan Muslim Malaysia, Datuk Syed Omar Al Sagaff, Ketua Pegawai Eksekutif Widad Business Group, Dato' Mohd. Rizal Mohd. Jaafar dan Ketua Pegawai Eksekutif Petronas ICT Sdn. Bhd., Izwan Hasli Ibrahim.